



## Komunikadu Imprensa 11 Marsu 2025

### **JSMP apresia aas tebes ho iniciativa Parlamentu Nasionál atu halo alterasaun ba Rejimentu Parlamentár hodi inklui sansaun ba deputadu ne'ebé la kumpri**

Parlamentu Nasionál iha loron 06 Marsu 2025, realiza reuniaun konvokatóriu líder Bankada Parlamentár sira nian tuir provizaun alinea j) pontu 1) Artigu 17 Rejimentu Parlamentu Nasionál nian. Iha reuniaun ne'e, deputadu sira mós diskute kona-ba JSMP nia komunikadu imprensa datadu 25 Feveireiru 2025 relasiona atitude deputadu sira nian iha reuniaun plenária ne'ebé la tuir Rejimentu Parlamentu.

*“JSMP nia PR (komunikadu imprensa) ne'e importante loos no sujere ba Prezidente Parlamentu no mós asesór sira atu haree didi'ak rejimentu parlamentár ne'e para bele halo revizaun ba regimentu ne'e. Iha Rejimentu ne'e laiha artigu spesífiku ida hodi regula kona-ba atitude no mós sansaun sira nune'e prezisa loos tau iha agenda para halo revizaun”, Xefe Bankada CNRT, Distintu Deputadu Duarte Nunes.*

Maioria líder bankada, alende Bankada CNRT, ezije para halo alterasaun ba Lei Nú. 15/2009 ne'ebé altera ho Lei Nú. 1/2016 kona-ba Rejimentu Parlamentu Nasionál hodi inklui provizaun kona-ba sansaun ba membru deputadu ne'ebé bainhira hala'o nia knaar la kumpri rejimentu ne'e.

*“JSMP nia PR ne'e atu fanu ita atu koloka ita nia an nu'udar deputadu ne'ebé kualidade iha órgaun ida ne'e. Iha sorin seluk mós, ida ne'e hanesan hahalok no atitude pesoál ida nian, nune'e sujere atu hadi'a no mós halo revizaun ba Rejimentu Parlamentu nian ne'e, nune'e deputadu sira labele halo moe órgaun ida ne'e. Sujere ba Prezidente Parlamentu atu tau agenda ba loron segunda no tersa nian no labele husik Meza PN mamuk iha loron segunda no tersa”, Xefe Bankada KHUNTO, Distintu Deputadu Antonio Verdial.*

Iha diskusaun ne'e, líder bankada sira ezije ba Prezidente Parlamentu Nasionál atu prepara matéria fixa ba revizaun ba rejimentu ne'e. Iha sorin seluk, representante hosi Governu ba asuntu parlamentár, Sr. Aderito Hugo, rekoñese duni erru sira ne'ebé maka deputadu sira halo hodi la kumpri Rejimentu Parlamentu nian ne'e.

*“Kódigu konduta no Rejimentu ne'e bele halo revizaun iha tempu tuir mai tanba durante ne'e seidauk halo revizaun ba Rejimentu ne'e desde inísiu to ohin loron, nune'e sei halo revizaun iha governasaun ida ne'e”, Prezidente Parlamentu Nasionál, Distinta Deputada Fernanda Lay.*



“JSMP apresia aas tebes no konkorda absolutamente ho hanoin deputadu sira nian atu altera lalais Rejimentu Parlamentu hodi inklui sansaun no ida ne’e di’ak liután. JSMP mós propoin atu estabelese Komisaun Étika no Dixiplinár ida hodi bele reforsa implementasaun ba lei ne’e iha termu prosesu ba halo desizaun no aplikasaun sansaun nian. Iha alterasaun ne’e, bele prevee kedas provizaun ida katak bainhira mosu violasaun ne’ebé grave bele hetan sansaun to’o lakon mandatu hodi *bele asegura serbisu no funsionamentu Parlamentu Nasionál nian la’o ho di’ak, efetivu no dignu iha ezerse nia kompeténsia konstitusónal sira iha halo lei, fiskalizasaun foti desizaun polítika tuir Artigu 92 Konstituisaun*”, dehan Sra. Ana Paula Marçal, Diretora Ezekutiva JSMP.

Iha provizaun Artigu 10 Rejimentu Parlamentu nian prevee ona kona-ba devér sira deputadu sira nian, maibé seidak iha provizaun ida kona-ba sansaun ba deputadu sira ne’ebé la kumpri sira-nia devér, nune’e, loke dalan ba deputadu sira balun atu viola Rejimentu ne’e hanesan akontese beibeik ona.

Deputadu sira, bainhira halo sira nia knaar la kumpri Rejimentu ne’e, la’ós de’it la halo tuir sira nia devér sira, maibé mós la halo tuir sira nia juramentu ba Maromak, ba Povu no sira nia onra rasik hodi halo tuir Konstituisaun no lei sira bainhira toma pose. Iha Artigu 43 Rejimentu Parlamentu kona-ba juramentu deputadu sira nian, defini katak:

*“Juro por Deus, pelo Povo e por minha honra, cumprir com lealdade as funções em que sou investido, cumprir e fazer cumprir a Constituição e a Lei e dedicar toda a minha energia e capacidade à defesa e consolidação da independência, unidade e integridade nacionais.”*

Alende ne’e, Prezidente Parlamentu Nasionál ezije ba líder bankada sira atu kontrolu no mós tau atensaun ba membru deputadu sira nia atetude.

Relasiona ho reponsabilidade Bankada sira nian, JSMP hanoin, iha futuru Bankada Parlamentár sira bele estabelese mós regra internál bankada nian hodi bele hatur regula ho di’ak atitude membru sira bankada nian iha nível reuniaun bankada no mós iha plenária no komisaun sira nian. Nune’e, deputadu sira bele halo knaar representasaun ba povu ho onra no bele dignifika Parlamentu Nasionál hanesan Uma Fukun Povu Timor-Leste nian.

Atu hetan informasaun kompleitu, favór kontaktu:

Ana Paula Marçal  
Diretora Ezekutiva JSMP  
Diresaun e-mail: ana@jsmp.tl  
Telefone: (+670) 33238883 | 77040735



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

Website: <https://jsmp.tl>

[info@jsmp.tl](mailto:info@jsmp.tl)